

煙霞萬古樓文集

一





集文樓古萬霞煙

(一)

撰 曇 王

故孝廉王君仲瞿奇才也。嘉慶二十一年七月嘗偕余遊雲臺山。同客海州刺史師禹門幕中者三閱月。仲瞿之學無所不窺。而尤工於駢體。直可壓倒齊梁。余戲題其詩文藁後云。斗牛之光。芒角四起。河海之水。縱橫萬里。似戰國策。亦韓非子。二千年來。無此才矣。或又謂仲瞿之作。真如決汝漢淮泗而注之江。合金銀銅鐵爲一鑪者也。仲瞿好游俠。兼通兵家言。善弓矢。上馬如飛。慷慨悲歌。不可一世。嘗謂余曰。吾死後必葬我於虎邱短簿祠側。乞題一碣曰。晉故散騎常侍東亭侯五十三世孫王曇之墓。其好奇如此。嗚呼惜哉。平生著作甚多。有經解三卷。史論三卷。西夏書四冊。洪範五事。官人書五類。未分卷。仿班固漢書例。居今稽古錄二十卷。讀竺貫華三十卷。繙鉛集一百卷。傳家六法一卷。隨園金石考四冊。煙霞萬古樓文集四十四卷。計散體六卷。四六文六卷。本集十六卷。外集十六卷。又歸農樂傳奇九齣。玉鉤洞天傳奇四十八齣。萬花緣傳奇四十八齣。遼蕭皇后十香傳奇十二齣。魚龍變傳奇四十八齣。俱未刻。僅刻駢體文六卷。亦殘闕矣。仲瞿既沒之二十載。余始集其文而傳之。爲述大略如此。道光十有八年孟夏。句吳錢泳書。時年政八十。

煙霞萬古樓文集卷一

穀城西楚霸王墓碑

秀水王曇仲瞿氏一名良士

乾隆五十九年。觀察泰武臨兵備。督山東全省糧運。前守濟南泰安府知府。長洲宋思仁。繕畢泰山馳道。種補天門上下長松。溝泄穀城水利。遂封樹於西楚霸王之墓。周方一畝。土階三等。屬其友人王曇爲文。惟王廐馬祥車。月矢日弓。臨汝江陽之戰。吳興廳事之中。一牛醢血。百騎騰風。王何神於蘇侯。蔣帝而不神於蕭琛。孔恭臣知王魂安卞山。死羞魯公也。王以漢五年葬穀城。魯生制服。漢王臨哭。嶽抱峯藏。汶回隧曲。談書遷筆。魯經史例。三皇五帝。楚書本紀。作者謂有大王之江東八千子弟。有孔子之廟堂車服禮器。佞臣班固。竇憲筆奴。爲葉公龍。爲史公豬。沈魂狴犴。置書葫蘆。臣知大王不愛平分之天下。而忍殺手版之腐儒哉。而竊爲大王幸。幸王不葬橐泉。雍宮祈年。冢驪麓。陰盤藍田。魚膏照尸。亡羊燒山。臣竊笑漢皇帝長陵坏土。高廟玉環。呂后淫屍。赤眉入關。而王陶人茅馬。紙衣瓦棺。斥上無將軍之金。復土無校尉之官。南山鐵固。石槨泥丸。臣竊笑漢子孫。茂陵原陵。闕地及泉。園郎寢郎。邑瓦無烟。玉衣出柙。文園盜錢。作昌陵。便房方中。斲紵絮。陳漆其閒。校尉摸金而入鑿。郎將發邱而破穿。而大王佳城鬱鬱。萬壘銜泥。羣

烏耘田。壽於櫟陽萬年也。嬴趙毒螫。陳田淫虐。王燒秦宮室。夷齊城郭。復春秋九世之讐。報戰國六王之惡。食敖倉。戰京索。方將斬紂而自王。何云入關而背約。宋義走卒。項氏逋將。背武信而沮援。誑高陵而賺賞。陽將楚軍。陰爲齊相。幸君之敗。不忠。居軍之右。不讓。搏牛破虱之談。驕一軍而跋扈。猛虎貪狼之令。殺諸將如反掌。王不斬莊賈。難爲穰苴。不戮揚干。誰爲魏絳。牧奴孫心。芻狗兒戲。義非孤注。名類奕棋。如陳涉之號。扶蘇原非太子。或陽虎之竊。狀貌聊借蒙魑。楚方借面而弔喪。心乃尸居而餘氣。飾箏琶之爪者。義甲髡禿婦之髮者。義髻擁之則爲懷王。去之則爲義帝。曰取則取。曰廢則廢。大王方端冕以禮犧雞。祝宗以拜牢彘。而敢肩尻乎雕俎之上。縞素乎三軍之士者。漢王之詐也。榮仇不封。餘去無功。王諸將善地則忠。王故王醜地則公。漢方佩我關中之印。而奸我三秦之盟。樓煩則噴。楊喜則驚。質淫雉於軍中。不御。置太公於高俎。不烹。鴻門不殺。鴻溝不爭。而漢敢劫兵以犯我彭城。漢爲魚肉。楚爲刀俎。智不鬪。雕水流。力不伏。廣武弩。虜魏王不仁。梟塞王不武。滎陽西拔。靈壁東破。怯則銷六國印。懼則說九江布。張良如廁。始爲逃人。紀信乘車。終爲降虜。漢之十罪。臣不屑數也。爲天子不忠。報漢以桮羹。分之太公。爲天子不仁。報漢以嫗骨。醉之戚夫人。爲天子無禮。報漢以不類。如意之惠帝。爲天子無義。報漢以慙。不可言之審食其。擁帚不孝。頡羹不弟。墮二子車。不慈。死一婦手。不智。而大王七十戰之功。十七王之封。亘六帝四王而無窮也。宛邱太皞。濮陽高辛。黃帝橋山。唐帝穀林。九疑舜冢。苗山禹墳。湯無葬處。或曰汾陰。衡山二妃。鮒

魚九嬪。虞則烏江。王則穀城。臣謹案般人以柏。夏氏以松。將軍之樹。大王之風。銘曰。盤古葬魂。大王葬身。魂爲雷霆。身爲風雲。皮毛爲草木。髮髭爲星辰。頭爲東嶽。左臂爲衡。足爲西嶽。右臂爲恆。喜爲晴。怒爲陰。精髓爲玉。齒骨爲金。江河其血。地里其筋。眼爲日月。蛆蟲爲黎民。三百里海南之墓。周一畝大王之墳。

班固父子之廢項王本紀。微特王之罪人。亦孔子之罪人也。滅六國。燔六經。項不滅秦。而魯之廟堂車服。禮器有存焉乎。魯諸生爲王三年服。城守不下。尊孔也。非私項王也。司馬遷以項王功高。故加於孔子世家之上。而進之三皇五帝殷周之後。固何人斯。而黜王本紀。宜其狴犴死。而王之神靈。亦於是乎暗啞。咤叱。三百年於吳興之堂矣。漢章帝以班固爲葉公龍。鄭漁仲以固之比遷。如龍之與豬。其信然歟。是碑作於二千餘之後。蓋斷自二千餘年以來。無此手筆。東皐寶光錄

蟻碁孫夫人廟碑

蟻碁有廟。俗相傳爲吳大帝妹孫夫人。殉蜀主白帝崩聞。以黃武三年薨於此。吳書簡略。夫人與全公主大小虎無傳。失春秋內女致聘歸寧卒媵之例。案蜀志。進妹固好。不紀年月。大致在建安十三年十二月。赤壁破魏。蜀主牧荊州之十四年春。婚於京也。吳后傳。先主既得益州。而孫夫人還吳。亦不明敘。所以還吳之故。則法正已進瑁妻吳氏於宮。舟船之迎。夫人見幾作也。是歲爲二十年。權襲取長沙三郡分界連。

和之日。可想見蜀主與夫人籩豆同牢。七年主祭矣。陳壽所以有綢繆恩紀之筆也。廟無石。吳不知夫人之德。史無文。蜀不知夫人之仁。於是懲裴松之失。以補史官曰。

某聞殺龍蛇以祀川岳者。句踐之獻美人也。遇嫦娥以筮有黃者。成湯之嫁帝妹也。權之壻備。譬非塞庫。必無瞋目噬宜生之謀。事類師昏。亦斷不作反斗擊代王之計。大意謂吳蜀不爲一家。則一鼎三足不立。東西不主二帝。則一槽三馬難平。周郎之意。以爲婚姻者。春秋之王道也。縱橫者。戰國之長城也。橋公二女。皆嫁英雄。破虜四男。尙無佳壻。孫夫人之侍婢弓刀。亦猶甄夫人之借兄筆硯也。何也。破虜天下豪也。夫人將門子也。親見皇甫夫人以文武忠臣之妻。死刀圍而罵董卓。蔡文姬以徒行乞命之身。跌蓬首而拜曹公。生女如鼠。強臣若虎。峴山之父仇未報。小女不敢反龐娥之兵。許貢之兄讎未洩。女弟不能釋姊嫠之仗。此所以逐馬褰裘。翔鷗鳴鏑。大眼戎粧。小妹雍容。追隨於猢猻虎家兄之馬後。而史以爲驕豪多將。吳吏兵者過也。女子母教也。吳夫人助桓王軍國。疇不知訓井家風。大皇帝愛趙母文才。況又有宮中師傅。是蜀中三尺童子。皆知夫人文武兼資。禮義足智矣。而法正佞人也。賊舊君以賣國。譙新主以瀆倫。瑁妻。吳漢中王之宗婦人也。時也。關嚴道。銅梁。祭武擔。石鏡。夫人方將媾補漢天。夔鳴炎鼓。張錦繖以定羌涼。持赤節以平懿丕。而王已隗囂天水。子陽白帝。坐大之勢未安。櫛木之心遂蕩。伯明就后羿之室。闔廬居子建之宮。謂鄭多父貪鄩國夫人。利其土地。則吳非小君。謂晉文公睪子圉懷嬴。感其沃盥。則吳豈秦

援姐已以賜周公。曹操之所不收。寡婦何知社稷。孫后以爲可笑。此習鑿齒所謂匹夫猶惡無禮。惡法正。惡漢王也。夫人剛猛人也。無鹽薦枕。不取娛於好色之齊王。嫫母清宮。徒見忌於無情之黃帝。勢將醉飾。唐姬則烈女不能事亡國婦人。將麤爛望卿。則高明又必失中宮大度。與其椒房散號。口戰銀刀。左右英娥。心寒粉陣。使漢中王束帶自稱下官。耳順強呼娘子。芒刺在背。交戟入頸。以魚水夫妻爲戎狄。以酣睡臥榻爲他人。外揚高帝韓薄不脩之名。內彰孝文衽席無辨之醜。穆姜且豫卜東宮。雲臺亦自疑霧露。戚貓呂鼠。勝負未可知也。呼阿斗而告曰。深山大澤。余恐生龍蛇。以禍汝也。善事漢王。不暇刺促。顧婢子語矣。於斯時也。腸繞吳門。魂啼蜀鳥。夫人行矣。某獨笑趙子龍宮官也。左轂鳴。則雍門狄爲之請死矣。樓船御。則薛廣德爲之頸血矣。雲無張良。能羽翼太子之功。而有遠越實亡君夫人之罪。牽孺子爲牛之小恩。而率興愛子投車之大衆。扈當陽坂一抱零丁之弱子。而凌犯長秋宮七年大歸之小君。且以此舉截江留斗。爲大有名之師。足撼發吳人一笑也。雲試思愼夫人走邯鄲之道。袁盎如何卻退。晉穆羸抱太子而啼。趙盾可曾豪奪。借使夫人繡旗一怒。武帳珠襦。鼙鼓三中。水軍將令。呼孟勞而侍女刀光。叫餘皇而長裘濯棹。則其時。鱗鱗藏兵。白衣而呼警者。呂蒙也。艤衝脫紲。暴風而二拒者。董襲也。招以北風。丁奉之帆。登岸皆升城之督。麾以舵樓。谷利之令。上山皆白棒之兵。而夫人敬以鼓角勞軍。旂門受詔。蹕前周泰。縑蓋先鋒。馬後虞翻。持矛步從。雲能以一身之膽。納百婢之刀乎。吾恐張飛僅能瞋目橫矛。以決死據長坂。

橋不能牽人斫頭以沙囊斷長江流也。蓋其時權且大遣舟船迎妹。而夫人慟哭也。知夫人必以太子歸吳何也。魏略禪以建安十六年身賣漢中。父事劉括。禪年數歲竄匿。隨人西入漢中。爲人所賣。及建安十六年關中破亂。扶風人劉括。避亂入漢中。買得禪。問知其良家子。遂養爲子。與娶婦。生一子。初禪與父相失時。識其父字元德。比舍人有姓簡者。及備得益州。而簡爲將軍。備遣簡到漢中。舍都邸。禪乃詣簡。簡相檢。訊事皆符驗。簡喜以語張魯。魯乃洗浴送詣益州。備乃立爲太子。據魏略以爲建安十六年事。則在十三年趙雲抱太子之後。使其時杵嬰不識趙孤。書退勿呼父字。則十三年趙雲長坂之功。又委棄字於牛羊乳鬬文於邳虎矣。幸而方望真人能留孺子。華陽奇貨得歸異人。夫人念嬰嫺於伊水。此兒久付空桑。失抱帝之膝公。諸將誰爲擁樹。寧使漢家有烹羹置俎之太公。不可使劉氏有白板青衣之太子。與其吳鴻扈稽呼著父胸。孰若石紐塗山藏諸母腹。與其趙嬈胡組。誤二漢之保阿。孰若遜抗機雲親三吳之師傅。在英雄不顧妻孥。龍種豈無媼母。況孔甲有此乳兒。阿蘇何非己子。其挾以歸也。留震宮長子東方。免秦宓天頭西顧。秦康公之爲晉甥。非長安君之爲趙質也。而况阿斗者。甘后之玉人。又二兄之鼻涕。聖公升殿俯首羞慚。盆子探符。汗衣欲哭。夫人憫齊歸早死。雖然稠有童心。望周子迎京。或者悼能霸晉。且后緒自計。歸仍子疆。不曾廢母。則安知不六后臨朝。身猶故劍。四帝外立。留此前星。已不沙濛豕牢。人免薰君丹穴。此夫人嗽乳捫天。推乾就溼也。乃漢王始以孟子諱吳。終以向姜絕莒。不留堯母之門。忽絕鄧甥之好。謂娶妻必得陰麗華乎。則惟斯人乃有斯婦。謂生子當如孫仲謀乎。則無此舅焉有此甥。而蜀之人。乃以爲趙王歸漢。如意之酒必酖。燕丹機橋。太子之烏必白。則孫夫人非呂太后。吳大帝豈秦始皇耶。曰。使

趙雲勒兵斷江。魏晉春秋之言。佞臣法正之謀也。曰。與張飛勒兵截江。趙雲別傳之言。非丞相諸葛之策也。時正爲軍謀主。亮所謂正能制主上。亮不能制法正。故曰非亮罪也。太公之法曰。一女子當百丈夫。又曰。理四海如妻子。故孟津用婦人興周。孫武戰宮人勝楚。由余未霸。小戎以女子談兵。蚩尤不禽。元女以南車教戰。世能祖祖。鮮能將將也。而况吳多謀士。蜀無將才。使夫人以定姜卜戰之龜。灼銅雀金臺之兆。以馮嫪詔使之節。潛分香賣履之宮。將見西揖閼氏。魂褫冒頓。北呼公主。馬抱烏孫。割長江而讀甥舅聯盟之碑。開玉門以鑄外孫單于之印。許馬懿巾幗來朝。使甄后掖庭贊拜。而後東封呂範之妻。歸拜張昭之母。江東衣錦。炎漢重興也。而乃鼎未三分。商亡一物。夫人遜國。淫后如宮。使虎威南郡。忿興拜賜之師。伯言夷陵。怒報泛舟之役。而猶謂楚文荆尸。勿因息媯。齊桓伐楚。不爲蔡姬。吾不信也。向使夫人身不歸吳。計能鎮蜀。則長沙零桂。焉知不三索來歸。雲長益陽。又何必單刀去會。罷巫峽七百里之屯。唾獬亭四十營之火。全琮陸遜。安敢輕佻。黃蓋韓當。豈能平視。箠使吳兵。鞭敲蜀將。又何必西增白帝之兵。東益巴邱之戍哉。亮書曰。主上之在公安也。外慮曹操孫權之逼。內懼夫人肘腋之憂。曰在公安者。言初婚至京。一卮鬻酒之夫人。非于飛入蜀七年牀第之夫人也。某聞春秋之義。忿不廢親。怨不滅德。殺陵尙報秦施。城濮不忘楚惠。蜀主乃不念敗亡。樊口棄其室家。奔問柴桑。未諧昏媾。吾江東先之魯肅。但有蒼梧遁跡之言。詢之孔明。惟有披髮山林之請。而其時甘皇思血飛小沛。有狐誰綏。曹丞相筆落許都。荊州誰借。設

孫將軍或有趙襄夏屋之忌。孫夫人不守季平一負之仁。借弟姊以摩笄。中鑿壺於智伯。則吾江東帳構之銅。皆專諸之鉞也。夫英雄之見。助夫不非慶女。殺夫亦是雍妻。而卒使齊姜返國。無煩蠶妾之謀。嫖妹于歸。不浴龍工之藥。則可知西施越絕。斷無種蠡陰謀。昭君和親。不是漢宮祕計矣。乃蜀主恩忘齊大。陰輕子忽之援。義蔑秦嬴。佯忍先軫之唾。此吳國君臣。寧以盤郢之劍送死女。不以女滕之口食殘魚也。夫人蓋以有生日爲未亡人矣。讀魯史。孔子以彭城予宋。非予宋也。通吳援也。虎牢予鄭。非予鄭也。脩楚戰也。吳無荊州。而巫峽之援不通。吳無荊州。而濡須之隄難戰。是吳以一女初婚。失三江大局矣。吳爲索地。蜀實負人。魯橫江所謂凡夫不忍行。而况整領人物之主者。非怨語也。洎乎臨沮敗好。盪寇歸元。白帝脩盟。張溫報聘。安知非哀姜哭市。內椎敦后之環。綠衣拜勤。外解宋王之閉。而能敦舊乎。夫自古處女爭桑。尙開邊釁。焉有呂姜斷髮。不啓鄰仇。在夫人埋璧情深。履薪怨小。謀桑不霸。就木徒甘。輟聲已帷堂。不視之哭。應意其畫紙埋人之識。漸臺水沒。萬里江長。杞國城崩。千年蜀破。娥皇無子。堯母無夫。伊可慟也。嗚呼。白狐九尾。開山啓母之魂。暴雨飄風。杜宇鵲禽之血。讀華覈宮門發表。吳太情深。惡法正盜國奸宗。蜀無人理。某竊笑君王巾幗。女子英雄。手陳承祚殘書兩冊。牝后有名。悲裴松之補注千條。夫人無傳。此天難補。斷女媧神化之腸。是文若傳。掛吳國宮門之眼。銘曰。

雌鳳不隨。雌龍不飛。三分鼎足。一篋當歸。于歸不戀京。大歸不出惡聲。國君外淫。夫人不爭。公安無家。夫

人則守。益州有家。夫人則走。爭國世子。劫君王后。子龍之膽敢如斗。樊口來婚。喪家之狗。三年不言。三年不笑。繞吳門者。腸倚大井者。教戴冠佩劍。夫人之孝。以智事備。則隨。以禮事備。則歸。以仁事備。子其子。以義事備。死則死。蟲八蜀腹。橫目苟身。薰蕕不同器。以劉瑁妻爲夫人。勇而禮不亂。仁而禮能斷。亡乎亡乎。有夫人之德。而不能興漢。婦人有集。英雄有記。吳書寥寥。蜀書廢。桓桓夫人。弓刀侍婢。

鄰水縣先賢子路顯神碑

梓潼不神。夔子無靈。於是有蜀賊徐添德者。紅巾鼓亂。綠林弄兵。脅達州九姓之衆。攻鄰水斗大之城。田單守卽墨。而天神下降。法和軍江陵。而羣神隨行。長圍於丙辰。垂破於庚申。羌蠻三兔之窟合。秦楚一蛇之勢成。豈特人肝切膾。柳下跖之大盜。城頭子路。刁子都而同名哉。守鄰水將。宰鄰水令。勇則樓煩入壁。怯則陳餘棄印。城上尸膊。地中角鳴。叢祠狐鳴。而呼火。毛人泣城。而見精。於是讀孝經。則漢朝皆笑。拜韓信。則一軍皆驚。如我友甘補堂孝廉冕。以達徒七十。當瞎巴三千。拾旗之續。蟠於地。鐘鼓之音。震於天。宣父圍匡之日。仲由氏結纓之年也。時冕以鄉兵萬餘入糧絕。冕縊於荒谷。懸絕。得賊糧。鄉兵復振。冕以義從五萬人。保西鄉八九路。百戰艱危。五年暴露。人謂曲阜有曾參。則鷗臯不入城郭。宋君用墨子。則輸盤撤其攻具。冕勝則爲子思。守敗不爲武城去。使徐賊負偃王筋骨而來爭。聽與霸鈴聲。而不懼非勇也。不知鳥窮則啄。獸窮則攫。顏子仁人之言也。時有宦逼民變之謠。見邸抄。白羽若月。赤羽若日。季路有勇之氣也。昔李靖告華山。而呼僕射。蕭遘籲瞿唐。

而見白帝。心之感則思禽之制在炁。四塘鄭祈三塗晉祭。薨收虎爪夢其威。刑天干戚誅其厲。我先賢示夢於鄰水校官也。命以黑旗書子路之神。白堊寫至聖先師之位。當四門插當火器跪如靈姑旌如桑林旆。賊之礮侈聲。祚賊之圍魚鱗潰者何也。冕抑知寶雞黃蛇之時。崇不聆隧之神。天淵玉女。礪館神君。巫咸神大而詛楚。杜主鬼小而霸秦。而况石盤虎尾。由也雷精。雞冠猊佩。尼山素臣。乃狐黯畏子路之目。而堂衣犯孔子之門。城破則桓魋樹拔。賊入則金絲堂焚。使其開吾戶。據吾牀。飲吾酒。此城勿守。孰若料虎頭。編虎鬚。免虎口。此路可走。先賢所爲。蒲弓木戟。子路遺孤仲子崔。以蒲弓木戟。報狐厥殺父仇。見孝子傳。蠡耀蛟奮。仇敵在前。乳虎在後也。某聞天之所輔者德。神之所佑者國。狀成湯伊尹之夢。則晏嬰不伐宋師。廢祝融鬻熊之祀。則夔人終爲楚滅。祿山大盜。居軋犖而爲鬪神。周公神兵。助隋朝而戰李密。霍神以白衣助唐王。峻以陰兵討賊。卞山救臨汝。項王之土偶如風。大眼寇鍾離。蔣帝之馬蹄盡溼。何必祭子胥以牛酒。祀之推以寒食。元謨救命。空誦觀音之咒。敬則還神。徒殺十牛之劫哉。案唐咸通五年。有黔軍校。居宣父廟。每食則薦。每夢則教。見王者衣冠曰。吾孔仲尼也。汝當以更名顯。以殺賊效。以司農卿晉汝之官。以謬宗儒易汝之號。其後蠻寇滅。孔子笑。今冕之戰多甚於彼。而冕之署功辭其報者又何也。冕之言曰。戰五年而滅賊非勇。殺萬人而受賞非仁。方冕受圍於鄰水也。守無韋叡。戰無張巡。婦人則琅邪呂姥。王羲仙。苗婦也。時起於南籠。女子則睦州碩真。齊王氏。贅女也。以白衣起於襄陽。欲與徐璜合。子不聞順者或亡。逆者或存。盧循禱戰。助水者南康之廟。爾朱入洛。縮波者

灋津之神降靈則有摩醯出盪則有子文倘鄴下神兵不破朱榮之膽城隍風浪反助慕容之事則冕方且之反之策殿焉能有若之保稷門人見僕射陂邊有無數小旗之李衛國冕不望臨海廟裏有一州相報之陰子春也幸而鬼叫狼啼乘茅將軍出獵之勢鳴鼙響角藉夏后子赤城之靈使徐賊五斗道窮償其鬼卒八公山木見此人形不然則豕狗入曾參之室河伯陷澹臺之城冕亦將覆醢而待死斷纓而無生天不絕五殘六賊昭明咸漢之妖國不宜養黎軒幻人木熙假子之兵墨吏矯虔而虎冠兵官干擻而膽青險不使俎豆饗宮之司寇脫冕微行而出走燔臺率爾之仲由三都一怒而墮郈我爲子說子爲我銘銘曰

隣水之圍掘鼠煮弩有睢陽危無玉壁固冕也斷顏回之劍絕曾參之火如子路氏拜拯溺牛暴馮河虎制虎者頭扼虎者喉戎山顯神至於韞邱時惟仲由使有若三百人之中樊遲踰溝冉求用矛勝兵八百養徒三千縞衣白冠端木氏陳說其閒如甘興霸如魯仲連贈顏回少師贈曾參少保子路行行司空一轟何居乎宓子賤之一琴冕抱之而終老

漢高安侯董賢廟碑

讀漢書至董偃令終鄧通強死未嘗不廢書歎也醋離小忌乃積怒於青宮含桃餘甘不操刀於太子者豈無術哉予登華山遍遊秦中求唐陵碑版至杜鄠見有漢高安侯董賢廟焉塹垣聿興棖桷肸飾曰異

哉。此道州有鼻之祠。常山董卓之廟乎。曹操廟於夷陵。而申屠撤之。王敦像於武昌。而溫嶠去之。此無怪秦檜之血食於溫。吳元濟之俎豆於蔡也。遂下馬。見堂廡樹碑。大書以辨哀帝臥起之妄。其文甚美。因揖神而告曰。嗚乎聖卿。君侯奚見辨之小也。君臣魚水。何鰓鰓於臥起不臥起哉。昔馬援與隗囂同臥。魯肅與孫權同榻。關張國士也。於先主同牀。衛霍大將也。而茂陵外嬖。爲大臣者感幸臣一星之恩。割袖藉眠之愛。內平四母之爭。外攘五侯之橫。撤簾而太后入於雲臺。徙薪而將軍止於畫室。一河帶礪。九廟磐桑。雖首枕帝膝。股加帝腹。良史美談也。而彪固不爲君侯佳傳者。以侯有大司馬之權。不早除一王莽爾。莽不奪侯之印。則新都之功不侯。莽不斲侯之棺。則丁傅之屍不戮。是君侯假司馬。而新莽眞皇帝也。侯自謂居高位。蒙盛寵。不害一士大夫。誠盛德也。然某竊爲侯罪也。侯不請斬馬尙方之劍。殺張禹。乞養牛上尊之酒。殺孔光。黿纓白冠。槃水而賜巨君。而侯公賓漸臺。漢不得厝太山之安矣。謂侯無罪。某請以有罪數侯可乎。漢郎侍中官。皆傅粉貝帶冠鵠鵠。而侯傳漏黃門。不奢領脩褻衣小袖。不敬其罪一。延年始幸。僅給事狗監。新聲協律。而聖卿初拜。卽駙馬都尉侍中。驂乘不讓其罪二。秬侯以弄兒壯大。擁項而誅之。而董恭以男妾國奢。尻帶而貴之。不孝其罪三。淳于亂長定宮。不謹身與嬖外交。而昭儀入椒風舍。且旦夕與妻上下不別其罪四。鄧氏布天下錢。死不着身一簪。而縣官沒董氏財。賣且四十億萬。不忠其罪五。韓嫣徒以先趨副車。江都王驚爲天子。而高安乃以後穿登天。麒麟殿傳爲堯舜。不道其罪六。富平儀比

將軍。不過走馬鬪雞。長楊五柞。而高安食邑千戶。遂致五殿六門。連臺北闕。不制其罪七。寵已在丁傳之右。而代明位爲大司馬。事已誤東平之獄。而借雲禍爲高安侯。不次其罪八。識溫室省中之樹。丞相拜於車前。欺匈奴孤憤之君。單于拜於殿上。不恥其罪九。至於便房題湊。塋塚僭於義陵。玉柙珠襦。禁兵索於武庫。不反地上。反地下也。其罪十。如是諸罪。爲君侯口實也。雖然。某數侯之善。昔衛青不舉士。而君侯實薦何武。石顯害名賢。而君侯不讐師丹。王嘉嘔血。侯無必殺望之之心。鄭崇上書。侯亦無沈廢更生之意。大行在殯。張放之淚不乾。山陵未成。向魑之目盡腫。王莽神姦。而僅責尙方醫藥之弗親。東廂喪事。不治。則可知藉閔婉媚。別無材能。安陵虜身。但知螻蟻。侯之無罪。萬歲千秋也。夫鳳凰負義。則反苻帝於阿房矣。艾豨忘恩。則逐靈公於死鳥矣。使侯當日者。承執中受命之詔。不屑共鯀。居然羿。稟釋子貢婦人之衣。成妹喜丈夫之志。以雌風而竟薰重華之宮。以男子而竟作女媧之帝。借炎漢之金椎。碎亡新之威斗。銅山久已自鑄。黃袍早可加身。則斬蛇之天下。安知不爲擾龍氏之天下也。嗚呼。光武與嚴光共寢。誰見星文。鄧萬與桓帝同牀。何干天變。君臣之交。何鰓鰓於臥起不臥起哉。飛來大鳥。誰似埋屍朱詡之忠。死後前魚。宜必有驩兜崇州之廟。

附錄袁弓韜董賢廟碑原文

此碑已載華南山制府所脩
西安府志第七十九卷

錢唐袁弓韜。以西安郡丞奉檄禱雨於終南之太乙靈湫。經杜鄠。有神祠焉。神金貂華袞。如漢上公服。

問土人曰。府君廟也。弓韜時脩太白神祠。意欲移其垣棟。是夕宿候館。夢神召見曰。余非唐崔府君。乃漢大司馬高安侯董聖卿也。哀帝末造。爲賊臣王莽所害。天帝謂予在朝。雖居高位。蒙盛寵。未嘗害一士大夫。不合羸尸埋獄。且遭發棺之慘。命予署西極郎位。專司此方雨暘。弓韜見神妍媚。因憶賢本傳。有美麗自喜之語。諦視不止。神有頰色。旋轉怒曰。汝毋爲班固所欺也。固作哀帝紀。謂帝雅不好聲色。時覽卞射武戲。卽位痿痺。末年寢劇。賢本傳中。亦有主疾無嗣之語。如此安能復幸我邪。當日君臣相得。與上同臥起。事實有之。此是漢家故事。孝武時。衛青霍去病兩大將。亦蒙此寵。可以安陵龍陽例視。邪。容貌華麗。天所賦也。非貌美者必僻行。且幸臣一星。上應天象。此我二千年難明之案。子爲我昭雪之言未畢。有鬼卒二。牽一囚。聲嘶頭禿。捧一卷書至。墀下。神指曰。此莽賊也。上帝以其罪惡滔天。監置寒門。爲毒蛇齧嚼。今始赦出。爲我司溷圜。犯小過。輒以毒草鞭鞭之。弓韜因問。囚手何書。神笑曰。此賊酷好周禮。至今抱持。每受鞭。尙以護背。弓韜就視。果周禮。猶有臣劉歆恭校字。不覺失笑而寤。次日禱畢。議新其廟。復夢神謝曰。蒙君脩廟。甚感。但思一人配食。吏朱詡者。曾爲我自効。去大司馬府收葬我。我訴於帝。帝嘉詡義。命子浮爲光武大司馬云。弓韜歸西安。捐俸爲倡。數月廟成。旁壙朱詡像。并壙一囚。爲莽持書跪塔下。如夢見狀。署門爲漢大司馬高安侯董府君之廟。而刊之石。